



21. maj 2007

Inatsisartut Suleriaasissaanni § 36 imm. 1 naapertorlugu apeqqutit uku Naalakkersuisunut apeqqutigaakka:

Naalakkersuisunut apeqqutit KNR-ip ukiumoortumik naatsorsuutai pillugit.

(Inatsisartunut ilaasortaq Lene Knüppel, Demokraatit)

Pissutigisaq:

Inussiarnersumik KNR-ip 2006-imut naatsorsuutaanut annertunerusunik nassuiaaqqusilaassanga.

2006-imi KNR 1.693.000 kr.-nik amigartooruteqarsimavoq naak 1.094.000 kr.-nik sinneqartooruteqassangasimagaluarluni. Tassa imaappoq 2.787.000 kr.-nik naatsorsuutigisamit ajornerusumik inerpeqarpoq. Tassunga tunngatillugu aqutsisut nalunaarutaannit takusassaavoq amigartoornermut peqputaasoq pingaartoq tassaasoq digitaliseeriinermut (kisitsisaannangortitsinermut) aningaasartuutit 2,9 mio. kr.-usut. Kisitsisaannangortitsinerup kingunerisaanit KNR 2007-imi 10,7 mio. kr.-nik amigartooruteqassalluni ilimagaa.

1. Naalakkersuisut KNR-ip 2006-imi naatsorsuutitigut angusai 2007-imullu naatsorsuutitigut ilimagisai naammaginatutut nalilernerlugit?
2. Naatsorsuutit nalunaarsuutaannit nr. 2-mit erserpoq 2006-imi isertitat Aningaasartuutissat inatsisaannit tapiissutit saniatigut tapiliussatut aningaasaliissutit 179.000 kr.-usut. Tapiliussatut aningaasaliissutit inatsisaasigut KNR-imut 2006-imi taama aningaasartalinnik takussutissaqanngimmat tamanna annertunerusumik nassuiaqquneqarpoq.

Aqutsisut nalunaarutaannit manna takuneqarsinnaavoq (qallunaatuani qupp.5):

"... KNR nalilinnik pigisaqaqqusaanngilaq, taamaattumik atortut (kisitsisaannangortitsissutit) naatsorsuutit inaarutaanni aningaasartuutit aalajangiussimapput. Tamanna pissutigalugu nalilinnut aningaasaliissutit ukiumoortumik naatsorsuutit toqqaannartumik sunneqqavai."

Ukiumoortumik naatsorsuutit inatsisaanni pigisat nalillit ima nassuiaaserneqarput (ilanngussaq 1 imm. C.2): *"Nalillit suliffiup pigiuannagassaatur imaluunniit atortuaannagassaatur siunertaqartut."* Tassaakkajuttarlutik illuliorfissat, illuutit, nioqutissiorfiit/tunisassiorfiit, maskiinaatit, ingerlatsinermut atortut kiisalu pigisat/atortut/pequtit. Tamanna naatsorsuusereriaaseq atornerqartoq pillugu naatsorsuutit paasissutissiinerinut sanilliunneqassaaq, tassani nalilinnik pigisat pillugit allassimammatt suliffiup pigisai nuunneqarsinnaanngitsut nalingi (illuutit il.il.) naatsorsuutinut ilanngunneqarsimannngimmata Landskarsip naatsorsuutaani aningaasalersorneqarlutillu aningaasartuutit nalunaarsorneqartarmata.



3. Naatsorsuutitut atanera taanna annertunersumik nalunaajaqquneqarpoq, taannalu ilutigalugu malugeqquneqarluni tunngaviusumik eqqoqqissaanngissinnaammat KNR-ip allakkamiuk suliffeqarfik nalilinnik pigisaqaqqusaanngitsaq, imaammammi aallakaatitsisarfik pigisalik/atortunik/pequtunik aallakaatitassiornermilu atortunik il.il. pigisalittut oqaatigisariaqar-mat.

Aqutsisut qulaani issuagannguami kalerriuppaat atortunik kisitsisaannangortitsissutitnik pisineq naatsorsuutit inaarutaanni aningaasartuutitut aalajangiusimasut kiisalu KNR-ip nalilinnut aningaasaliissutai ukiumoortumik naatsorsuutit toqqaannartumik sunneqqagai. Tassunga atatillugu malugeqquneqarpoq ippigineqarsinnaanngimmat KNR-ip aningaasaatimi ilai atortorissaarutitnik nutaanik pisinermut atorsimagamigit inaarutaa sunneqqaneqassammat. Illua'tungaategulli inaarutit qanoq nalunaarsortarnerinik ilisimasamut nalinginnaasumut tulluarluinnarluni ukiumoortumik naatsorsuutit pillugit inatsisip § 28-anni ilaatigut takunneqarsinnaasoq, tassani allassimammat naatsorsuutit inaarutaat tassaammat isertitat ilanngullugit naatsorsorneqarsimasut taavalu aningaasartuutit. Eqqumiiginanngitsuunngilarli suliffik kisitsisaannangortitsinissaq siunnerfigalugu pitsaanngilluinnartumik nammineq aningaasaatilik ammasumik sulii aammalu attartoqqinnissamut annertuumut ingerlammat tamatumalu nassatarisaanik sulii aammalu nammineq aningaasaatit ajorsisillugit, taannalu ilutigalugu aqutsisut ammasumik nalunaarutigalugu KNR-ip aningaasaqarnerata ileqqussaatur ilinissaa tamatuma kingorna ajornaatsuinnaassanngimmat.

4. Naalakkersuisut siulersuisut tungaanniit naliliinermut tassunga qanoq isumaqarpat? Naalakkersuisut assersuutigalugu KNR-imut ingerlatsinermik sunnuteqarluarnerusumik piumasaqaqqusilersaarnerlutik sipaarfiussanilluunniit nassaarniaqqusilersaarnerlugit KNR-ip aningaasatigut inassisimanagera pitsanngortinniarlugu?
5. Naalakkersuisut KNR-ip tunaartarisaa aningaasatigut illersorneqarsinnaasutut atasinnaasutulu nalilernerlugu?
6. Naalakkersuisut Inatsisartunut aningaasanik amerlanerusunik qinnuteqarnialersaarnerlutik KNR-ip kisitsisaannangortitsineranut aningaasartuutaasimasut pissutigalugit?

KNR-ip Naalakkersuisullu akornanni naammassisaqarnissamut isumaqatigiissummi april 2006-imeersumi takunneqarsinnaavoq (qallunaatuani qupp.6) 2006-imi KNR akissarsianut aningaasartuutit annertunerusut ilimagisimagaluarai suliniutit nutaat tigussaasut arlaqartut pissutigalugit.

7. Agguaqatigiissillugu sulisut amerlassusiat 2005-imi 108-miit 2006-imi 115-inut amerleriarnerat qanoq annertutigisumik suliniutinut taakkununga pisuutinneqarsinnaappat? Tassunga tunngatillugu malugeqquneqassaaq naammassisaqarnissamut isumaqatigiissut najoqqutaralugu annertunerusumik suliaqarnissap ilaanut ilaammat kalaallisut meeqqanut TV-kkut aallakaatitassiorarneq pingaartillugu annertunerusumik iliuuseqarnissaq ilimagineqarmat, aallakaatitsisarfiulli anguniagaq tamanna 62 %-iinnarmik naammassisaqarfigisimavaa!
8. Sulisut "saniatigut" sulisorineqarsimasut sunik suliaqartinneqarsimappat?



KNR-ip naammassisaqarnissamut isumaqatigiissutaani takuneqarsinnaavoq KNR ukiut tamaasa kingusinnerpaamik 1. april nalunaajaat public service immikkut suliarisassagaa aallakaatitsisarfiup isumaqatigiissummi anguniakkat qanoq naammassisimanerlugit pillugu.

9. Nalunaajaat taanna maanna qaammatip aappaa avillugu naammassineqareersimammat kinguarsaatigeqqinnagu ataani atsiortumut nassiuteqquneqarpoq.

10. Naalakkersuisut nalilernerlugu KNR-ip 2006-imi naammassisaqarnissamut isumaqatigiissummi piumasarisat naammassisimagai naatsorsuutini tv-kkut radiokkullu aallakaatitassiat pillugit kisitsisit nalunaarutaasut malillugit? Taamaangippat Naalakkersuisut tassunga atatilugu qanoq iliornialersaarpat?

Ilaatigut takuneqarsinnaavoq ”meeqqanut inuusuttunullu” tv-kkut suliat 20,9 tiimit aallakaatinneqarsimasut naatsortuutigisat 33,8 tiimit anguneqarsimanatik.

11. Qulaani taaneqartoq 12,9 tiiminik suliakinnerusimaneq Naalakkersuisut naammagintinnerlugu? Taamaangippat Naalakkersuisut taava qanoq iliornialersaarpat?

Aammattaq takuneqarsinnaavoq ”ilinniartitsineq” qulequtaralugu 8,1 tiimit tv-kkut aallakaatitsinerit pilersaarutigineqarsimasut 2006-imilu 0 tiimit aallakaatinneqarsimasut.

12. Naammassisaq tamanna Naalakkersuisut naammagintinnerlugu? Taamaangippat Naalakkersuisut tassunga tunngatillugu qanoq iliornialersaarpat?

13. Naalakkersuisut kissaatigintinnerlugu oqaatsinik ilinniutinik soorlu kalaallisut, qallunaatut tuluttullu KNR siunissami aallakaatitsisassasoq? Taamaassimappat Naalakkersuisut qanoq iliuuseqarnialersaaruteqarnerlutik?

2006-imi raadiukkut aallakaatitassiornerit pillugit KNR-ip naammassisaqarnissamut isumaqatigiisut taamaallaat 85 %-imik naammassisimavaa. Tassa 2006-imi aallakaatitassiat suliarineqarsimasut Naalakkersuisunut isumaqatigiisutigineqartunit 471,1 tiiminik ikinnerusimapput.

KNR 2006-imi ilinniusianik radiokkut aallakaatitassanik suliaqarsimanngivippoq, uffa katillugit 19 tiimit suliarineqarsimasussaagaluartut. Taassuma saniatigut kingumut aamma ”meeqqanut inuusuttunullu” tiimit suliarineqarsimasut isumaqatigiisutigineqartunit ikinnerusimapput – nagataatigullu minnerunngitsumilli ”eqqumiitsuliorneq kulturilu” naammassisaqarnissamut isumaqatigiisut naapertorlugu isumaqatigiisutigineqartunit 612 tiiminik ikinnerusut suliarineqarsimapput!

14. KNR-ip nikinganerit taama angitigisut qanoq nassuiarpai Naalakkersuisullu tamanna qanoq isumaqarfigivaat? Tassunga tunngatillugu Naalakkersuisut ajornartorsiutinut tigussaasumik qanoq iliuuseqarniarnertik pillugu kalerriusseqquneqarput.

KNR-ip naatsorsuutaanut tunngatillugu naatsorsuutini tiimit nalunaarutigineqartut aamma tiimit naammassisaqarnissamut isumaqatigiissummi kiisalu 2006-imut Aningaasartuutissat inatsisaanni tiimit pineqartut arlalitsigut nikingassuteqarput. Assersuutigalugu naatsorsuutini takusassaavoq



KNR-ip naatsorsuutigigaa 2160,5 tiimit kalaallisut aallakaatitassiat eqqumiitsuliornermut aamma kulturimut tunngasut 2006-imi aallakaatikkumaarlugit, kisianni tiimit 2006-imut Aningaasartuutissat inatsisaanni aammalu naammassisaqarnissamut isumaqatigiisummi 2008 tiimiusut.

Nikingassutit taamaattut aamma KNR-ip naatsorsuutaani saqqummiunneqartuni takussaapput tv-kkut aallakaatitassiani tiiminut tunngatillugu immikkoortuni ”eqqumiitsuliorneq kulturilu” kiisalu ”nutaarsiassat aamma maannakkut pisut”.

15. Nassuiaat annertunerusoq piumanearpoq kisitsisit nikingassutaasut qulaani taaneqartut pil-lugit KNR-ip 2006-imut naatsorsuutai naammassisaqarnissamut isumaqatigiisummut naleq-qiullugit aamma 2006-imut Aningaasartuutissat inatsisaannut naleqqiullugit.

16. Naatsorsuutit nalunaarsuutaanni takusassaavoq 2.699.000 kr. inigaqartut akissarsiaannut aki-liutigineqarsimasut. Kikkut taamannak inigaqarlutik akissarsisinneqarsimappat aamma suliat suut isumagisimavaat? Taasunga atatillugu kalerriutigeqquneqarpoq ukiuni naatsorsuiffiusu-ni siuliini inigaqartut akissarsiaasa ilaat akissarsiatut nalinginnaasutut akiliutigineqartarsima-nersut.

17. Siulersuisut 2006-imi akissarsisinneqarnerat 396.000 kr.-usut siulittaasumut, siulittaasup tullianut siulersuisunilu ilaasortat sinnerinut qanoq agguataarneqarsimappat?

Aamma allassimavoq KNR Music Awards ukiut tamaasa pisartussanngortoq.

18. Siunissami KNR-ip pisoq taanna nuannarineqaqisoq kalaallisut qallunaatullumi aamma aal-lakatissallugu naatsorsuutiginerlugu isiginnaartartut sapinngisamik amerlasuut isumagiimal-lugit?

Inussiarnersumik allakkiap matuma tiguneraniit ullut suliffiusut 10 qaangiutsinnagit akissut piu-manearpoq.

Inussiarnersumik,

Lene Knüppel